

《無爲庵詩稿》

1 孔子誕辰上課途中有感

六佂回旋嶽降辰，時情無奈不親仁。太牢尙見全牛在，世上何曾要聖人！

註：孔子誕辰，首度取消放假，開車至校途中不禁咨嗟。

2 至天隱廬雅集呈國風畫會同仁

常來天隱興無厭，竹屋清風墨韻恬。楚簡近知新豹變，秦銘已放老龍潛。
卅年舊雨成陳釀，滿座名家拂素縑。我學板橋揮數筆，虛心終是遜蘇髯。

註：天隱廬主人書法近來專注於楚簡書風之臨摹與創新，故有頷聯。

3 白老鼠

生來玉質卻辛酸，爲鼠誰知萬萬難！不只貓欺與犬吠，更愁鷹啄或蛇餐。
願供扁鵲尋經絡，甘爲華陀剝膽肝。起死幾人念微物？世間同類莫心寒。

註：有人寄詩數十首來，雖是閒詠，實不離擊鉢體。其中有詠十二生肖者，頗觸動詩興，因以〈白老鼠〉爲詠以卻寄。

4 春雨

東皇初學畫，調色欲塗鴉，失手傾盤水，飄來萬點花。

5 初訪金門

長因戰備阻來程，銀翼衝霄載夢行。地穴穿迴龍蠖穩，天河飛轉兔蟾明。
數聞烽火浯江赤，暫賞秋光大武晴。好酒高粱逕須酌，風雲隔海望昇平。

6 與友泛太湖

載酒來尋范蠡舟，五湖煙景豁吟眸。波涵越國英雄氣，雲結吳宮粉黛愁。
天地混茫浮一葉，古今飄忽任千秋。杯傾琥珀酬知己，醉不高歌不自由。

7 美國九一一紐約雙子星大廈驚爆

噫吁戲！奇乎怪哉！銀鷄撲窗疑有誤？大廈一時噴煙霧。鬼哭神號莫知因，紅燄吐舌烙雙柱。內中男女數萬人，幾千消防思救護。巨構萎頓從天傾，驚見縱身如墜鷲。一機衝撞一機來，五角大廈同出事；又傳航班不見蹤，舉世頓時皆恐怖！慘禍爾來事漸明，原是蓋打發狂怒。不惜生靈成灰燼，金融中心爲鬼墓。美國當今號獨強，氣盛豈期有此遇。哀哀無辜遭此災，公道欲向何神訴？但聞通緝賓拉丹，旋向海珊索武庫。英美重兵三十萬，戰機艦艇無窮數。兵燹眼看又燃眉，和平有腳將怯步。世人但知快恩仇，冤冤相報有誰悟！殺人者人恒殺之，古今幾人爲脫兔？

8 安平國姓宴上即席

宏開盛宴賀生辰，命世英雄第一人。帝業消殘圖霸業，儒巾焚卻換綸巾。
空聞雞識題仙篆，徒見鯨波漲海濱。蝦卷蚶煎傳古味，忽來風雨或通神！

9 觀府城〈台灣燈會〉有感

府城老矣久無功，元夜隨潮默采風。一鏡斜升花市月，萬燈倒映水晶宮。
鳳凰飛翥碼頭上，鸚鵡穿梭人海中。縱是催眠心亦樂，何當煙火正燃紅。

10 種竹(蘭亭分得陽字韻)

翻泥碎土上高崗，種竹乘曦灌溉忙。愛彼傳心勞汗簡，不誇秉節鬥秋霜。
今朝坐詠尊師友，他日來儀見鳳凰。莫笑生無食肉相，醫貪醫俗賴斯方。

11 悼黛安娜王妃

人以黛妃哀，我以黛妃榮。此時若不死，他日知何名？麗質傾天下，宮中
冷如冰！懸疑將千古，當前盡美評。玫瑰十萬朵，無須問芳馨。

12 湖邊觀雨

連朝沛雨樹懸泉，綠漲平湖浸野煙，深水無舟空負力，輕浮落葉小橋邊。

13 黃花毛風鈴花

串串風鈴掛滿枝，湖邊驚豔步遲遲。黃花如海喧群雀，省識春風得意時。

14 龔教授賢伉儷來訪

相知二十載，今日始登門。儒雅欽風久，容光映華溫。人心推厚德，詩道
重高論。唯有忘機友，能無芥蒂痕。

15 黑面琵鷺

白臉書生俊，黑面爲鳥難！舉世纔五百，天闊無所安。曾文溪口外，拳足
北風寒。終日縮長脰，偶爾梳雪翰。十步才一啄，得食便爲餐。恨有爲富
者，兀自窺長灘！鈍嘴知無力，愁對金銀彈。茫茫海平線，望之彌心酸。

註：聞有某財團力爭在七股黑面琵鷺棲息地建鋼鐵工業區。

16 陽明山國際電台站候 303 公車不至

苦候公車顧盼頻，陽明光景一時新。青山嫵媚囊中少，辜負紅櫻默向人。

註：至臺大閱卷，借宿中華電訊招待所，每日以 303 公車與捷運往返。

誰知假日班次改變，久候不至，因以自解悶。

17 讀近人詩有感

臺灣通漢化，士子例能詩。延平心在國，鄭經志未移。永華籌遠計，首學開先基。後來東山起，吟聲震海湄。爾來四百載，珊瑚千萬枝。竹塹風蕭瑟，胡蘆韻淋漓。櫟社與南社，風骨不可欺。斯文繫私塾，偏正不易持。功能傳斷緒，弊亦不自知。積非易為是，擊鉢日奔馳。雖然有好句，畢竟非真詩。遊戲與創作，在情不在詞。聲律雖不誤，質木俗難醫。欲將凡骨換，萬卷破莫遲。大海擊游鯨，莫迷翡翠兒！

18 黃龍洞

龍洞深藏海底天，天機一洩擾龍眠。眠情應羨桃源絕，不似人舟如蟻旋。

19 十里畫廊

連峰十里畫圖開，人指仙翁採藥回。滄海幾經黃石化，留侯或恐又重來。
註：以上遊張家界二首。

20 重經葛州大壩

長江萬里浪滔滔，大壩重經感二毛。佇待三竿觀變化，果然水漲自船高。
註：遊艇經葛州大壩，不論上下，皆須在壩中等待水位調整方可通行。

21 乘維多利亞輪入巫峽有感

百繞千迴更萬彎，虎牙交錯盡高山。每逢路絕非真絕，祇在船頭一轉間。

22 路過小西門

小西門位在小東門東，天顛地倒兮理不同，人間處處兮逢錯置，見慣不怪兮唯司空！子蘭得意兮屈原貶，都郵囂張兮淵明窮；林甫威赫兮九齡去，令狐絢赫兮義山矇。真宰欲成兮千載名，必誕斯惡兮助其功。小東門久隱兮非偶然，小西門倒置兮醒癡聾！

註：府城「小西門」原在西門路靠海處，別稱「靖波門」。因道路拓寬，本擬遷移至勝利路「小東門」遺址，卻遍尋不著，乃隨意置之。不久，小東門遺址意外出土，因此當前遂有「小東門」比「小西門」更西邊之怪現象。

23 登合歡山東峰

東峰似矮隱奇兵，山外層山入碧城。劍竹為床憑借喘，杜鵑莫笑老先生。

註：合歡山東峰於山腳望之甚不起眼，初以為易易耳。熟知山外有山，數疊不已，余終至累倒在劍竹上氣喘噓噓！

24 朝登合歡山北峰

喘上高峰旭日東，杜鵑五月醉顏紅。薰風不減霜風冷，顧盼無人影自雄。

註：臺灣原生種玉山杜鵑，五月盛開。

25 除夕重金購荷蘭重瓣孤挺花一株

重重瓣瓣自孤奇，紅線鑲邊滾蕾絲；妻子笑言又添妾，花唇欲辯復無辭。

26 讀金剛經

諸法空時不是空，禪家妙有妙無窮。金剛夜徹知降住，著相沾塵未竟功。

27 暮經風鈴花下偶見

不是凋零花漸殘，抬頭松鼠正加餐。津津一幅渾知味，愛鼠憐花覺兩難。

註：驚蟄前一日(2004年3月4日)，暮經成功湖風鈴花下，正納悶何以花初開而影已稀，抬頭正見松鼠大快朵頤。飛鵬、耀潏兄適至，笑囑當賦詩一首，乃以之命筆。

28 戲贈智學法師

海青一襲駐童顏，已破禪門萬萬關。常見沾花兼惹草，如來妙諦不言間。

29 合歡山莊對雪

飄棉鋪絮不應寒，縮頸重裘尙覺單。日午風刀狂剖面，夢邊霜箭亂穿冠。
是花相對宜連理，非被可憐號合歡。欲與洪涯同把臂，步虛聯詠醉雲端。

30 移竹二十二韻

性耽畫竹因種竹，竹影扶疏已成簇。忽然荒地主人來，通知丈量擬建屋。
胸次雖然早逆料，事來終覺猶太速？對竹無言暗心酸，恨無餘錢買幽谷！
新筍兩支正抽莖，好夢曾經入淇澳。前年始脫小盆拘，轉眼又將入跼蹙。
雲姿已展不易收，鳳尾何忍重剪禿？芳鄰有地允暫移，所幸平時尚敦睦。
唯憐臘月氣凜冽，遷植何異行殺戮！手揮鋤頭開圓溝，淋漓汗落背與腹。
澆灌欲令頑土化，修根爲使生機伏。鄰翁笑把啤酒來，戲言辛勤有後福。
憶昔故里樂漁田，庭前院後皆翠樹。皇考蒐羅多奇卉，當中一叢七賢矗。
月下離離影映窗，時見丹淵圖一幅。初學板橋試塗鴉，筆畫無神技不熟。
有緣得入環碧軒，南北奔波托飛轂。畫幹疊葉講論精，始識庖丁異凡俗。
琅玕從此作知音，胸中丘壑得私淑。虛心非謂全中空，韌節尤難輕屈服。
姑且又養小盆中，他日偕汝隱雲麓。